

Simpanan air Pulau Pinang turun 25 peratus, penduduk diminta kurangkan penggunaan

Tarikh kemaskini: 19/02/2019



Kadar simpanan air mentah di Empangan Air Itam di sini, mengalami penurunan ketara berikutan faktor cuaca panas dan kemarau yang dijangka berlarutan hingga akhir Mac ini.

GEORGE TOWN, 19 Feb (Bernama) -- Perbadanan Bekalan Air Pulau Pinang Sdn Bhd (PBAPP) hari ini meminta penduduk di negeri ini menggunakan air secara berhemat berikutan keadaan cuaca kering sejak awal Januari lepas.

Kapasiti efektif di Empangan Air Itam dekat sini telah menurun hampir 25 peratus dalam tempoh 48 hari apabila hanya 67.3 peratus dicatatkan semalam berbanding 92.2 peratus direkodkan pada 1 Jan lepas.

“Taburan hujan yang rendah adalah sebab utama penurunan dramatik dalam kapasiti efektif empangan ini. Empangan ini mencatatkan hanya 94mm hujan (antara 1 Jan lepas dan semalam),” kata Ketua Pegawai Eksekutif PBAPP, Datuk Jaseni Maidinsa dalam satu kenyataan hari ini.

Sementara itu Empangan Teluk Bahang pula hanya mencatatkan peningkatan 0.3 peratus apabila kapasiti efektifnya berada pada paras 79.1 peratus semalam berbanding 78.8 peratus pada hari pertama tahun ini.

Jaseni juga berkata purata pengambilan air harian daripada kapasiti efektif Empangan Air Itam meningkat antara 0.40 peratus dan 0.64 peratus dalam tempoh 1 Jan dan 18 Feb tahun ini, berbanding hanya 0.15 peratus untuk tempoh yang sama tahun lepas.

“Tahap penggunaan air yang tinggi ini agak gawat, terutama apabila simpanan air mentah di Empangan Air Itam mengalami penurunan yang ketara. PBAPP memohon kerjasama dan timbang rasa dari semua pengguna ... sila kurangkan penggunaan air harian anda dengan segera,” katanya.

Sementara itu Bernama dalam tinjauannya dimaklumkan simpanan air mentah di Empangan Air Itam boleh bertahan sehingga 66 hari sementara Empangan Teluk Bahang pula selama 239 hari.

Amaran peringkat awal akan dikeluarkan sekiranya kapasiti efektif di empangan-empangan berkenaan menurun ke tahap 50 peratus.

-- BERNAMA